

Ministère de l'Agriculture, de la Viticulture et du Développement rural,	8
Référence: <u>722/222</u>	
15 NOV. 2022	
A traiter par:	
Copie à:	

N° 7185
Entrée le 15.11.2022
Déclarée recevable
Président de la Chambre des Députés
(s.) Fernand Etgen
Luxembourg, le 15.11.2022



Här Fernand Etgen
President vun der Chamber

Lëtzebuerg, de 15. November 2022

Här President,

Esou wéi den Artikel 80 vum Chambersreglement et virgesäit, bieden ech Iech, dës parlamentaresch Fro un d'Madamm Ëmweltministesch an un den Här Landwirtschaftsminister weiderzeleeden.

Laut dem groussherzogleche Reglement vum 16. Abrëll 2021 ginn et an de verschiddeenen Dréinkwaasser-Schutzzonen an de Stauséi-Gemengen diverse Restriktiounen bei der Beweedung a bei der Ausbréngung vu Mëscht. Ënner anerem sinn an dem Reglement Periode festgeluecht, wou d'Véi net, oder just mat enger Ausnamegenemigung dierf op d'Weed. An deem Kontext wollt ech folgend Froen un d'Madamm Ëmweltministesch an un den Här Landwirtschaftsminister stellen.

- Si Dir der Meenung, dat d'Beweedung muss no feste kalendareschen Datumer gereegelt ginn, wuelwëssend datt d'Natur sech net un Datumer hält?
- Si Dir net der Meenung, dat eng Beweedung vun de Wisen wéinst den aktuell héijen Temperaturen am Moment esou guer virdeelhaft wier, souwuel fir d'Natur, wéi och fir d'Déieren?
- Firwat kënnen et Ausnamen fir Ganzjoeresbeweedung ginn, wann déi klassesch Mammekéi awer müssen ab dem 16. November vun der Weed geholl ginn?
 - Kënnen fir d'Mammekéi Ausnamen ugefrot ginn?
 - Missten déi Ausnamen net innerhalb vun e puer Stonnen respektiv innerhalb vun e puer Deeg geneemegt ginn, well d'Beweedung wiederofhängeg ass?
 - Wéi séier ginn am Normalfall d'Ausnamen autoriséiert?
- Ass d'Regierung bereet, dat betreffend Reglement unzepassen?
 - Wa jo, wéini?
 - Wa nee, fir wat net?

Här President, ech bieden Iech, mäin déifste Respekt unzehuelen.

Martine Hansen, Deputéiert



Gemeinsam Äntwert vun der Ministesch fir Ëmwelt, Klima an nohalteg Entwécklung an dem Minister fir Landwirtschaft, Wäibau a ländlech Entwécklung op d'parlamentaresch Fro n°7185 vum 15. November 2022 vun der éierewäerten Deputéierten Madamm Martine Hansen iwwert "Pâturage"

Sitt Dir der Meenung, dat d'Beweedung muss no feste kalendareschen Datumer gereegelt ginn, wuelwëssend datt d'Natur sech net un Datumer hält?

Dat groussherzoglecht Reglement vum 16. Abrëll 2021 (Règlement grand-ducal du 16 avril 2021 délimitant les zones de protection autour du lac de la Haute-Sûre et déterminant les installations, travaux et activités interdites, réglementées ou soumises à autorisation dans ces zones et modifiant le règlement grand-ducal du 11 septembre 2017 instituant un ensemble de régimes d'aides pour la sauvegarde de la diversité biologique en milieu rural) fir d'Ausweisung vun den Dréinkwaasserschutzzone ronderëm de Stauséi huet als Zil eis gréissten Dréinkwaasserressource virun alle méiglechen negativen Impakter ze schützen déi duerch verschiddenst Aktivitéiten (Siedlungswasserwirtschaft, Landwirtschaft, etc.) kënnen entstoën.

Well d'Beweedung besonnesch um Enn vum Hierscht a während de Wanterméint kann zu enger Belaaschtung vun der Waasserqualitét féieren, steet am Reglement dass eng Wanterbeweedung tëschent dem 16. November an dem 15. Februar net stattfanne kann. Wann allerdéngs séchergestallt ass, datt nach genuch Fudder um Feld ass an et net zu enger Iwwerbeweedung ka féieren, kënnen d'Déieren all Dag während e puer Stonnen erausgoen. Dës Formulatioun gouf extra integréiert, nodeems d'Demande vum Secteur dofir am Kader vun der Consultation publique komm ass.

Dëst erlaabt de Betriber, hier Déieren am Wanter kuerz erauszeloossen. Besonnesch kleng Familljebetriber oder Pärdsbesëtzer, déi hir Terrainen no beim Stall hunn, erlaabt dëst, d'Déieren och ganz kurzfristeg erauszeloossen. D'Formuléierung aus dem groussherzogleche Reglement erlaabt deemno elo schonn eng bestëmmte Flexibilitét en Fonctioun vun den natierleche Gegebenheeten. Déi Datume sinn ee Kompromëss tëscht Waasserschutzaspekter an de Besoinen vum Secteur fir Rechts- a Planungssécherheet. Den Datum ass iwwerens esou gewielt, dass e mat den Virgaben am Kader vun der Nitratdirektiv alignéiert ass, fir eng Multitude vu verschiddenen Datume fir de selwechten Secteur ze vermeiden. Des Weideren ass de 16. November relativ spët am Joer, wou d'Wiederkonditiounen souwiesou dacks net méi ganz favorabel si fir eng Beweedung.

Sitt Dir net der Meenung, dat eng Beweedung vun de Wisen wéinst den aktuell héijen Temperaturen am Moment esou guer virdeelhaft wier, souwuel fir d'Natur, wéi och fir d'Déieren?

Och wann d'Temperaturen dëst Joer am Duerchschnëtt méi héich waren, sinn déi aktuell Wiederkonditiounen mat villem an heefegem Reen net onproblematesch, wat d'Auswäschtung vun de Nährstoffen ugeet.

Wann d'Wiederkonditiounen méi naass sinn, ginn d'Fläche nämlech méi duerch de Véihtrëtt beschiedegt a wat méi Déieren méi laang op enger Weed stinn, wat de Véihtrëtt méi Schued um Buedem verursaacht. Dee Moment gëtt de Buedem an déi doran enthale Nährstoffen vum Reen ausgewäsch. Gläichzäiteg ginn am Wanter, wa keng Vegetationsperiod ass an d'Planzen also net wuessen, manner Nährstoffen vum Buedem a vun de Planzen opgeholl. Dowéinst ginn déi Nährstoffen dann eben bei Reen a Richtung Baach ausgewäsch. Dee Risiko ass natierlech méi grouss, wat et méi reent. Doduerch ginn d'Niewebaachen an de Stauséi - eis wichtegst Dréinkwaasserressource - belaascht. A genee fir dat ze verhënneren, sinn d'Bestëmmungen vum groussherzogleche Reglement do.



Firwat kënnen et Ausnamen fir Ganzjoeresbeweedung ginn, wann déi classesch Mammekéi awer mussen ab dem 16. November vun der Weed geholl ginn?

Am Indice 32 vum uewe genannte groussherzogleche Reglement stinn déi genee Konditiounen déi mussen erfëllt ginn, fir dass d'Déieren iwwert den Datum vum 16. November eraus kënnen dobaussen op der Weed bleiwen. Et muss een nidderege Véihbesatz pro Hektar sinn (maximal 0,8 Düngeeenheete pro Hektar), et muss genuch Weed do sinn, déi net komplett duerchnässt ass an et muss een ee Regëster féieren. Wann dës 3 Konditiounen erfëllt sinn, kënnen d'Déieren op der Wee bleiwen. D'Mammekéi sinn net vun dëse Bestëmmungen ausgeschloss.

Kënnen fir d'Mammekéi Ausnamen ugefrot ginn?

Wéi uewe präziséiert si Mammekéi net ausgeschloss.

Missten déi Ausnamen net innerhalb vun e puer Stonnen respektiv innerhalb vun e puer Deeg geneemegt ginn, well d'Beweedung wiederofhängeg ass?

Dat groussherzoglecht Reglement gesäit verschidden Derogatiounsméiglechkeete vir. Heifir mussen awer déi gängeg Autorisatiounsprozeduren agehale ginn, dat heescht dass d'Decisioune mussen offiziell ausgehaange ginn. Dëst ass deemno net an e puer Stonne méiglech.

Landwirtschaftlech Betriber kënnen esou eng Derogatioun natierlech och schon am Laf vum Joer ufroen - dëst gëtt och recommandéiert - sou dass si d'Beweedung iwwert de 16. November eraus schonn no den uewe genannten Kritäre plange kënnen.

Wéi séier ginn am Normalfall d'Ausnamen autoriséiert?

D'Bestëmmungen zu den Derogatiounen zu de Beweedunge si réischt dëst Joer a Kraaft getrueden, dofir leien nach keng statistesch Donnéeë vir.

Ass d'Regierung bereet, dat betreffend Reglement unzepassen? Wa jo, wéini? Wa nee, fir wat net?

Wéinst dem extrem wichtege Schutz vun eiser gréisster Dréinkwaasserreserve si keng weider Ouverturen niewent deenen uewendriwwer beschriwwenen virgesinn.

Lëtzebuerg, de 5. Dezember 2022
(s.) Joëlle Welfring
Ministesch fir Ëmwelt, Klima an nohalteg Entwécklung